

# LETA ÄTRUNGA BINAME BIME BAU ME LUI CINA HEBERU MENE JIICEMUSI

*Acejiyame me Mene Abocломteji Gyene Teeme  
Bägrä me Ireclota cabu ca*

<sup>1</sup> Sasa cabu ca Acejiyame te bucurage padare piyyepu bucurage maramara gaabe ca mime kaakesaare bine mene jaajananemuge teeme mename biname bime cabu ca.

<sup>2</sup> Yepä, ai ceräcerägääbu padare cabu tabe mibibine mene nijananinige teeme Bägrä cabu ca. Teeme Bägrä peese nyene lui me kaakesea ca tabe ai gawecewe piyyepu iyeta cabucewe apaclyera gwidape bine itu tewenemuji. Piyyepu teeme Bägrä peese nyene lui ne Acejiyame itu jejuji yageyame äbitame iyeta gwidape tääpume ceräcerägääbu padare cabu.

<sup>3</sup> Tabé saapaclýäruge Acejiyame me jamyacu apaclyera cama; cuta tabe Acejiyame cama yepä pana opo gyene. Tabé teeme kokrerage mene cama iyeta gawecewe piyyepu cabucewe gwidape bine teeme maramara gaabe cabu ire jetwenenemige. Tabé biname bine kälyä jewenemuji teeme niyyaniya mule cabu ca, piba cabucewe je adnatuji Iyeta Kokre cama Acejiyame me camu poto je.

*Aceji Bägrä Lui Baborage Gyene Mename Seemo  
cabu ca*

**4** Aceji Bägrä pui name pi baborage äbituji iyeta mename seemo cabu ca, epu pana pui ngii Acejiyame lui teebine ecäruji lipu baborage gyene mename seemo bime ngii cabu ca.

**5** Yoo, Acejiyame licarage nuuja mename seemo ne jejuji, yepä Bägrä ne taatu jejuji egä,

“Maane cäme Bägrä gäte;

cane page määme Babe me bäbitine.”

Cuta piiyepu tabe lica nuuja mename seemo poto cidi me jejuji, yepä Bägrä poto cidi me egä,

“Cane teeme Babe me pagege äbita;

piiyepu tabe cäme Bägrä me pagege lenaja.”

**6** Yoo, padare liba mameta ge Acejiyame teeme uuge Bägrä ne ätyepame ai gawecewe cabu me, tabe piba jejuji egä,

“Iyeta Acejiyame me mename seemo cina miiji Bägrä ne awepyeräja.”

**7** Siige, agesa Acejiyame me mene teeme mename seemo poto cidi me,

“Cane cäme mename seemo bine buuwemope pana me jaawenemune;

Yoo, teipi lui cäme kaakeseayame gemi,

cane teebibine muye wädräji pana me jaawenemune.”

**8** Yepä, teeme Bägrä poto cidi me tabe jiicenige egä,

“Maane lui Acejiyame gäte, lui puupu ne jepänenite biname bine peema cita ca waadename,

peei puupu lui määme yene yeteta ngälu cäco.

Maane biname bine conocäco yaawadanemute.

**9** Maane toracarage singi conocäco mule tääpume, yepä niiya mule bine jäägymute.

Peei name pi cane, määme Acejiyame, mee-  
bine itu naajujine,  
piiyepu ngenecu gege nääcärujine,  
cane liba caburage naawenujine iyeta weeme  
nuuja bime cabu ca.” Siige.

<sup>10</sup> Acejiyame te Bägrä poto cidi me cuta nuuja taje  
jejuji egä,

“Maane lui Yageyame gäte, maane ai gawecewe ne  
itu jewenujite niinäce padare cabu.

Maane cuta cabucewe ne jewenujite  
määmerage ime ca.

<sup>11</sup> Teipi iyeta cirege apesera, yepä maane taatu  
cire naanajepi.

Teipi iyeta sasa cire läbitipesi cäbletääpe pana.

<sup>12</sup> Maane teebibine cire iyeblengemepi tuwängle  
tääpume,

epu pana biname te cäbletääpe ne lipu yiire-  
mutuge, yääclubicuge.

Yepä, maane iyeteta gäte; lica cirege sasa me äbita.”

<sup>13</sup> Yoo, Acejiyame apu mene licarage jaajuge  
teeme nuuja mename seemo ne egä,

“Adnati cäme camu poto cidi ca,  
ngälu cane määme cubuyame bine  
määme ernge gawe me cire yaacrane-  
mepene.”

<sup>14</sup> Yoo, mename seemo teipi ngena pana gemi?  
Teipi iyeta seemo gemi lui cina Acejiyame  
tääpume kaakesea jewenenemisi. Tabe teebibine  
jäätyepemuge pui biname bine ätityeräjame lui cina  
niiya cabu ca cirege äsecrera iyeteta ireclota teeme  
cabu ca cirege päpäname.

## 2

*Mine Miji Acejiyame me Mene ne Yaacatusi*

<sup>1</sup> Yoo, mine miji mime ngene atwanena cängena acrana peei toraca mene cabu mine lui ituge ätecija, naace tääpume mine piba lica mime gaabe ne pagege abmala.

<sup>2</sup> Yoo, sasa mene cotre poto cidi me, mename seemo cina lui bine ituge waadena piiyepu Moose lui soogäremuji, biname lui cina peei cotre mene lica itecijemuji wawename, teepi teeme mäpu daremu jepänemujisi.

<sup>3</sup> Cuta page Acejiyame me nuuja mene pisi nyene tabe lipu owecu gyene biname bime tääpume, teebibine äsecrerame gaabe ituge wawena peei mäpu daremu cabu ca. Mine miji peei mene ne ätrunga. Yepä, mine liba apu ningenininige egä peei mene lui papa gyene, piiyepu lica yaacatusi, mine piba lipulipu äsecrera mime mäpurage daremu cabu ca, ingle mime nuuja äsecrera gaabe lica ge. Yoo, peei Miji Mene Acejiyame me owecu poto cidi me, mime Yageyame Yeesu te biname bine niinäce jejemuji. Puga lui cina itecijemuji, teepi mibibine umle niwenininujisi egä peei mene lui toraca ge.

<sup>4</sup> Cuta Acejiyame peei mene toraca me jewabemuji liba kokre ecäremuji pui ire arbi biname bine teepi maramara kokre, ciitaca, piiyepu owowä mule bine wawenecäjame, cuta piiyepu Aceji Seemo me maramara kokre liba biname yepäyepä bine ecäranemuji, tabe laati bime tääpume singi ceerame.

*Yeesu Taatu Miiji Gyene Mibibine Äsecrera Gaabe Ceerame*

<sup>5</sup> Ai mene lui ciige gawecewe poto cidi me. Acejiyame teeme mename seemo bine lica icrane-mige ciige gawecewe ne acaname.

<sup>6</sup> Yepä, mene pisi nyene Oogäräneji Mene cabu gawecewe ne acana biname poto cidi me egä,

“Acejiyame, maane caburage gäte. Maane ngenome biname bime tääpume ngene jwaatwananenute?

Ngenome papa biname bine yäängräremute?

<sup>7</sup> Maane teebine jewenujite matikolä gawe me mename seemo bime cabu ca.

Maane piba jamyacu apaclyera cabu teebine itu ecitujite miiji ngii päpäname.

<sup>8</sup> Maane teebine mope biname me jewenujite iyeta gwidape tääpume.”

Yoo, ai name pi peei mene te jiicenige egä Acejiyame biname ne mope biname me jewenuji iyeta ai gawecewe gwidape waadename, piba biname, gwidape, piiyepu iyeta lui teeme ime cabu temi. Yepä, camu gyene page pui padare, biname te liba iyeta gwidape cirege waadena.

<sup>9</sup> Yepä, peese nyene Yeesu lui te biname me äbituji. Tabe matikolä gawe me äbituji mename seemo cabu ca, pui matikolä padare liba ai gawecewe cabu enajuji, yepä page tabe jamyacu apaclyera cabu enajenige piiyepu teeme ngii caburage gyene, ai ingle naace popi tabe cewe itu oocananuji piiyepu budre itu jepänuji. Yoo, peei cabu ca mine umle gemi lipu baborage gyene Acejiyame me owecu biname bime tääpume, ingle

Yeesu me budre lui iyeta biname bime niiya mule äyeblengame.

**10** Iyeta gwidape lui Acejiyame tääpu memi, piiyepu teeme bau ca wawenäneji gemi. Peei name pi miji gyene egä tabe cuta Yeesu ne mäpu cabu ecituji, ingle Yeesu liba conocäco asatuji peeи mäpu cabu ca, tabe piba ibibi ge nuuja biname bine ätityerame teeme mäpu cabu ca äsecrera tääpume. Tabе bucourage Acejiyame me bägräwale saawadanemuge teeme jamyacu apaclyera cabu lenajame.

**11** Yoo, Yeesu lui te biname bine conocäco jaawenemuge, piiyepu teepi lui cina conocäco pepu läbitininusi, teepi iyeta yepä ingle cabu temi. Peei name pi Yeesu ajiri lica gyene mibibine ainame egä, “cäme binamewale gemi.”

**12** Tabе Oogäräneji Mene cabu Acejiyame ne je-jige egä,

“Cane määme ngii poto cidi me käme binamewale bine pa jaajananemepene.

Biname bime abasecretna cabu uupera bine pa yaatangemepene mee bine awepyeräjame.”

**13** Tabе cuta jiicenige egä,

“Cane Acejiyame ne pa jäätprungene.”

Tabе cuta nuuja mene jiicige egä,

“Cane age sâne igane bägrä cama Acejiyame te lui cebine itu näcärepı.”

**14** Yoo, ingle naace popi peeи bägrä lui binamerage tääpe cama ge, peeи name pi Yeesu teeme pana tääpe ecatuji biname me äbituji, naace tääpume egä biname pana tääpe cama tabe miji ge budre

päpäname. Peei budre ca tabe Satani ne epre-maluji, Satani lui ingle gyene budre täüpume,

**15** piiyepu biname bine isemuji lui cina wälu cama yaacrajanemuge budre poto cidi me.

**16** Yoo, pajecu gyene egä teepi mename seemo lica gemi, tabe lui bine yäätityäremuge, yepä Oogäräneji Mene apu jiicenige egä, "Tabe Abrahamo me kaakesaare bine yäätityäremuge."

**17** Yeesu peese nyene ätityerayame teeme iganewale täüpume, peei name pi tabe miji ge teeme binamewale pana äbitame iyeta gwidape cabu, naace täüpume tabe teebibine owecu cama waawename, ingle tabe cuta teeme mäpu ireclota cabu itu enajuji. Tabe epu pana gyene iiwäreja babo biname Israela biname bime irecu ätumuta mule ngalebora, lui teeme kaakesea cängenarage jaawenanuge Acejiyame täüpume biname bine kälyä wawenecame teeme niiya mule cabu ca.

**18** Yoo, Yeesu umle ge biname bime mäpu ireclota cabu lenaja. Tabe miji gyene biname bine ätityerame, Satani liba teebibine giri jaacitemuge niiya mule wawename, ingle Satani cuta teebine itu giri jecituji, yepä tabe kokre ge.

### 3

#### *Yeesu Baborage Gyene Moose cabu ca*

**1** Yoo, cäme ätrunga binamewale lui Acejiyame miji jäjäcräneji gemi, weeme ngene atwanena ecitepeye Yeesu bau me! Acejiyame teebine jitetyepuji iiwäreja mope biname pana äbitame mime ätru-nga mule cabu.

**2** Tabe teeme kaakesea cängenarage jewenuji Acejiyame täüpume, lui te teebine itu jejuji peei

kaakesea wawename. Moose cuta piiyepu teeme kaakesea cängena jewenuji, tabe liba iyeta Acejiyame me biname bine ewademuji.

<sup>3</sup> Yoo, mete raranga biname me ngii ne lipu baborage yaawepyeräjujisi mete cabu ca, pepu pana Yeesu me ngii baborage gyene Moose me ngii cabu ca.

<sup>4</sup> Iyeta mete lui biname cabu ca wawenäneji ge, yepä Acejiyame te iyeta gwidape bine jewenemuji.

<sup>5</sup> Yoo, Moose teeme kaakesea cängenarage jenenemuji Acejiyame me binamewale täüpume, lui cina epu pana Acejiyame me mete gemi, piiyepu Moose lui epu pana kaakesea bägrä gyene pui mete täüpume. Cuta lui gwidape poto cidi me tabe jiicemuji, Acejiyame ingwe padare cabu babo mene peei poto cidi me jiicemuji.

<sup>6</sup> Yepä, Acejiyame me miijirage Bägrä, mime Keriso, tabe epu pana gyene mete yageyame liiyepu, mime täüpume lui gemi Acejiyame me mete. Yeesu mime yepäyepä cabu enajenige, mine liba ngenecu kokre cama mime ätrunga cabu cängena ninajininige piiyepu ngenecu miji cama jewagrijenisi teeme padare täüpume.

### *Weene Gone Gloose Läbitininuye Acejiyame me Mene täüpume*

<sup>7</sup> Aceji Seemo te Oogäräneji Mene cabu jiicenige egä,

“Page weene liba Acejiyame me tagepogogo iteci-jinuge,

<sup>8-9</sup> ätecija cäco gone läbitininuye,  
epu pana weeme kaakesaare lipu singi cäco  
äbitininujisi Acejiyame poto cidi me.

Puga ge pui daapo taatu cewe cabu je weeme kaakesaare cina käme ngenecu miiji teeme täüpume napicetnärujisi.

Ngänu ge teepi käme miijirage kaakesea teeme täüpume tepänäjumesi footi kämäge ngalebora,

yepä cuta pui padare cabu napicetnärujisi.

<sup>10</sup> Peei name pi cane claabe me äbitujine, jiicujine egä,

‘Iyeta padare teepi ätecija käco gemi;  
teepi singi lica käme mene acatame!’

<sup>11</sup> Pui padare cane claabe me äbitujine, puma cita ca teebibine käme kokre ngii ca jejemujine egä,

‘Weene licarage ai miiji gawe cabu me ebäcniniye cane cama lenajame!’ ”

<sup>12</sup> Yoo, käme binamewale, weene cängena ire egä weeme yepä me ngene atwanena te lica niyyarage me läbituge, siige tabe piba ätrunga käco me läbituge, puma cita ca lapesaruge mime Ireclota Acejiyame bau ca.

<sup>13</sup> Miiji lica weeme nuuja me niiya mule te teebine yaangletnäjuge, tabe piba ätecija käco läbituge, peeи name pi weene miiji weemeweme ätyyeräjipeye iyeta bimu gaabegabe, ingle pui mene egä “page” Oogäräneji Mene cabu lui cuta mime tääpu myene ai padare cabu.

<sup>14</sup> Mine liba kokre cama jäätprungusi ngälu gaabe oomlaname, epu ätrunga cama mime lui niinäce padare cabu puga ge Acejiyame täüpume, mine piba Acejiyame me miiji ne Keriso cama jääpänu.

<sup>15</sup> Weene ai Oogäräneji Mene gone ngene jitrimalinuge egä,

“Page weene liba Acejiyame me tagepogogo iteci-jinuge,  
 ätecija cäco gone läbitininuye,  
 epu pana weeme kaakesaare lipu singi cäco  
 äbitininujisi Acejiyame poto cidi me.”

**16** Nää, laatibi Acejiyame me tagepogogo  
 yäätecijemuge, piba teeme täüpume singi cäco  
 äbitininujisi? Teepi peete nemi iyeta pui biname  
 Moose lui bine ewadimiji Aikupito gawe cabu ca.

**17** Acejiyame nää laati bime täüpume ngenecu ni-  
 iya me täbitenäjumi footi kämäge ngalebora? Teepi  
 peete nemi pui biname lui cina niiya mule cabu  
 icrajuji. Siige, teepi pui daapo taatu cewe cabu  
 puga budre äbitininujisi.

**18** Cuta laati bime poto cidi me Acejiyame te  
 kokre cama jiicuji egä, “Weene licarage ai miji  
 gawe cabu me ebäcniniye cane cama lenajame?”  
 Tabo eei bime poto cidi me jiicuji lui cina ätecija  
 cäco ge.

**19** Yoo, pajecu gyene egä teepi äblicäco ge peei  
 miji gawe cabu äbäcna, ingle teepi ätrunga cäco  
 gemi.

## 4

**1** Yoo, Acejiyame umle mene itu ecituji mine lipu  
 ten cama miji lenaja cirege. Pisi nyene pui mene.  
 Mine miji peei mene poto cidi me cängena ngene  
 jwaatwananinago, piba Acejiyame te lica mime  
 yepä ne cire jaajepi egä, “Maane lica cäme miji  
 lenaja cewe me abacitame.”

**2** Mine ituge ätecija peei Miji Mene, sasa Israela  
 biname liiyepu teeme padare cabu, yepä teeme

tääpume nuuja miji lica ge, ingle lui cina itecijemuji, teepi lica ätrunga cama ecatujisi.

<sup>3</sup> Yepä, mine ätrunga cama peeи mene ne ituge acata Acejiyame bau me äbäcname mijiirage lenaja tääpume, ingle mine umle teeme mene pui ätrunga cäco biname bime poto cidi me egä,

“Cane claabe me äbitujine, puma cita ca teebibine jejemujine egä,

‘Weene licarage ai miji gawe cabu me ebäcniniye cane cama lenajame! ’ ”

Yoo, tabe pepu jiicuji, ngänu ge pui lenaja gawe puu puga wawenäneji ge ai gawecewe agedna padare cabu ca.

<sup>4</sup> Oogäräneji Mene pisi nyene peeи poto cidi me egä, “Acejiyame seben me lui bimu cabu ngene ocuji, ingle siige teeme iyeta pui kaakesea.”

<sup>5</sup> Yepä, ngänu ge iyeta gwidape amacetnäjäneji icrajemuji, pui Israela biname cina licarage äbäcnujisi pui gawe cabu lenajame, ingle Acejiyame peeи mene itu jiicuji egä, “Weene licarage ai miji gawe cabu me ebäcniniye cane cama lenajame.”

<sup>6</sup> Acejiyame me Miji Mene cuta page pisi nyene biname cina ätrungame, äbäcname Acejiyame me mijiirage lenaja cewe cabucewe me. Yoo, pui biname lui cina Miji Mene ne niinäce gaabe je ituge ätecija, teepi puma lica ebäcnujisi teeme ätecija cäco mule name pi.

<sup>7</sup> Yoo, Acejiyame peeи name pi nuuja padare ecitiji biname cina äbäcname, piiyepu agesa peeи padare. Pui biname lui cina äblicäco äbäcna, teeme ingwe ca Acejiyame biname bine umle jewenemuji Mopeyame Daawida me tagepogogo ca kirece

padare poto cidi me. Cane uja bii jiicine teeme mene egä,

“Page, weene liba Acejiyame me tagepogogo itecijinuge,  
ätecija cäco gone läbitininuye!”

**8** Yoo, pui miji lenaja cewe Acejiyame cama lica gyene Israela gawe cabu, ingle ujarage Yosuwa biname bine ewademuji pui gawe cabu me, yepä Yosuwa me padare ingwe ca Acejiyame me mene cuta pisi nyene pui äbäcna padare poto cidi me pui miji lenaja cewe täüpume.

**9-10** Yoo, miji lenaja cewe Acejiyame cama cuta page pisi nyene teeme binamewale täüpume. Mine pui ne cirege päpäna, cuta puma ngene cirege oocana ai gawecewe me kaakesea poto cidi me, epu pana Acejiyame te lipu ngene itu oocuji pui seben me lui bimu cabu, tabe liba iyeta teeme pui kaakesea epiremuji.

**11** Yoo siige, mine miji kokre ngenecu cama teeme mene toracarage ätrungame, naace täüpume mine pui miji lenaja cewe cirege äbäcna Acejiyame cama lenajame. Mine gonerage mime yepä te ätecija cäco läbituge pui sasa biname liiyepu, lui cina lica ebäcnujisi.

**12** Yoo, weene cängena inajipi! Acejiyame me mene lui ireclota cama piiyepu kokre gyene. Äsweji turikä lipu girirage gyene, teeme mene pepu gyene. Turikä te lipu mäju jääläcnutuge kaake piiyepu umeli oomlaname, Acejiyame me kokre mene pepu jääläcnutuge biname bime trupa piiyepu seemo maramara wawename. Teeme

mene te biname bime singi piiyepu ngene atwanena bine jaatranemuge.

<sup>13</sup> Biname te äblicäco nuuja gwidape coo piiyepu nuuja ngene atwanena ämlita Acejiyame bau ca. Iyeta lui acwaba cäco, pajecu taatu gemi Acejiyame me opo gaabe je, lui bau me biname cina teemämu cire laitnäjipesi.

### *Yeesu Lui Mime tääpume Iiwäreja Babo Mope Biname Gyene*

<sup>14</sup> Yepä, mime tääpume pisi nyene ätityerayame. Yeesu Acejiyame me Bägrä itu acnenutuji cabucewe me, Babe ne awejename mime kälyä tääpume. Peese nyene teeme iiwäreja mope biname pana kaakesea mime tääpume. Peei name pi mine miiji ai ätrunga cabu cängena lenaja.

<sup>15</sup> Yeesu mime kälyä wawena biname te umle gyene mine lipu ngenecu onyaonya gemi, Satani te liba mibibine ningletnäjinuge. Teeme owecu pisi nyene, ingle Satani cuta singi ge teebine angletnejame iyeta mule cabu, mibibine liiyepu, tabe ai gawecewe cabu liba enajuji, yepä tabe lica Satani me singi bine jewanemuji; tabe conocäcorage enajuji.

<sup>16</sup> Yoo, mine miiji wälu cäco Acejiyame bau me otni teeme babo owecu pääpäname cuta piiyepu teeme ätityera, mine liba mäpu cabu ninajininuge.

## 5

<sup>1</sup> Yoo, Israela biname bime iiwäreja mope biname tabe lui yepä ge teeme binamewale cabu ca. Teeme kaakesea lui Acejiyame ne mene ja janena teeme binamewale tääpume. Tabe owecu

gwidape Acejiyame ne yääcäruge cuta piiyepu cibu gwidape ca Acejiyame ne yiwäräjuge biname bine kälyä wawename teeme niiya mule cabu ca.

<sup>2</sup> Ai ingle naace popi tabe lui binamerage gyene, nuuja taje tabe ngenecu onya birige. Peei name pi tabe teeme binamewale bine liba jäätämäge buduma piiyepu niiya mule cabu, tabe teebibine owecu cama jaasicnantemuge, ngene jwaatwanuge egä, “Nuuja taje cane pepu ngenecu onya cama birige.”

<sup>3</sup> Cuta peeи name pi tabe liba cibu ca Acejiyame ne yiwäräjuge biname bime niiya mule äyeblengame, tabe cuta teeme niiya mule äyeblengame yiwäräjuge.

<sup>4</sup> Cuta piiyepu nuuja biname te äblicäo peeи miji kaakesea ngii ne teemämu acata, yepä Acejiyame te biname ne jaajuge iiwäreja mope biname me äbitame, Aarona ne lipu ituge jaji iiwäreja mope biname me kaakesea acatame.

<sup>5</sup> Cuta pepu gyene, Keriso iiwäreja mope biname me miji ngii ne lica teemämu ecatuji, yepä Acejiyame teebine itu jejuji acatame. Tabe apu jejuji egä,

“Maane cäme Bägrä gäte;

cane page määme Babe me häbitine.”

<sup>6</sup> Cuta nuuja gome Acejiyame teebine jejuji egä, “Maane iiwäreja biname gäte epu pana Melkisideke liiyepu,

piiypu määme kaakesea lui ngälu cäco gyene.”

<sup>7</sup> Yoo, pui padare Keriso liba biname ge ai gawecewe cabu, tabe Acejiyame ne yaawejanuge nuuja taje ele cama. Nuuja taje babo tagepogogo cama

ala labayanuge teeme bau me lui te ibibi gyene teebine asatame budre cabu ca. Acejiyame teebine jiteciyuji, ingle iyeta padare Keriso singi ge teeme Babe me singi ne acatame.

<sup>8</sup> Yeesu Acejiyame me Bägrä ngänu ge, ai gawecewe cabu tabe umle äbituji Acejiyame me singi wawename teeme mäpu ireclota cewe oocanena cabu ca.

<sup>9</sup> Peei mäpu lenaja cabu ca tabe liba tasatuji conocäcorage, lui biname cina teebine jäätécijusi, teepi teeme cabu ca iyeteta ireclota ne jääpänsi.

<sup>10</sup> Acejiyame teebine iiwäreja mope biname ngii ecäruji, epu pana tabe Melkisideke ne yepä kaakesea ngii lipu ituge ceera.

### *Acejiyame me Mene Gone Abmala*

<sup>11</sup> Mime mene cerämu pisi nyene pee poto cidi me, yepä mäpurage gyene weeme tääpume abocломäjame, ingle weeme umle däägurage gyene.

<sup>12</sup> Weeme padare bucurage ituge Acejiyame me Mene ätecijame, weene umle cire läbitinejiye, weene nuuja bine cire yaabiberäjemejiye, yepä weene cuta cängena umle lica gemi. Biname te miji weebibine cääri abiberäja pee niinäce mene Acejiyame poto cidi me. Weene epu pana bägrä matimati gemi lui cina ngame migi yääänäjimus, camu gemi teeme deedeirage padare.

<sup>13</sup> Yoo, lui cina ngame migi yääänäjimus, teepi matimati bägrä gemi. Camu gemi teepi umle äbitena conocäco mule poto cidi me.

<sup>14</sup> Yepä, deedeirage lui modamoda biname bime tääpume. Peei lui epu pana mäpu cama abiberäja liiyepu biname bime tääpume lui cina geäji gemi

Acejiyame me singi wawename. Teepi ibibi gemi opo awatname lui mule gyene miji, lui gyene niiya.

## 6

<sup>1</sup> Yoo, peei name pi mine gone leca padare lenaja mime niinäce abiberäja cabu taatu, yepä mine miji cuta mäpu cama abiberäja ne acata. Miji lica mine jäje abiberäja ai niinäce gwidape poto cidi me egä: miji Acejiyame ne taatu ätrunga, cuta miji atatrongära niiya mule cabu ca, piiyepu lica mime kaakesea cabu ätrunga mime äsecrera tääpume.

<sup>2</sup> Mine miji lica jäje abiberäja maramara niye ca äciseja mule poto cidi me, coo ime acita poto cidi me biname bime papa cabu Aceji Seemo teeme trupa cabu piba abacitaname. Uja ge mime abiberäja budre biname bime arpinera poto cidi me, piiyepu ceräcerägääbu bimu me atrana poto cidi me.

<sup>3</sup> Acejiyame liba singi gyene, mine cuta mäpu cama mene pa yaabi-beräjemepesi.

<sup>4</sup> Yoo, mine äblicäco peei niinäce abiberäja cabu lenaja iyeta padare peei cabu ca biname bine ätityerame lui cina teemämu ituge äyeblenga Acejiyame bau ca. Teepi licarage cääri latatrongäruge pui niinäce mene lipu yaabiberäjemuge. Pui biname cina umle ituge pui Miji Mene Yeesu me ätityera poto cidi me. Teepi Acejiyame me miji cabu ituge lenaja, piiyepu Aceji Seemo teeme trupa yepäyepä cabu ituge abacitena.

<sup>5</sup> Teepi ituge umle äbitena Acejiyame me mene poto cidi me egä peei lui babo mijiirage gyene,

teepi piiyepu Acejiyame me kokre ne teeme biname bine waadena mule cabu ituge päpäna.

<sup>6</sup> Yoo, biname te pepu umle cama liba teemämu läyeblingtuge Acejiyame bau ca, tabe äblicäco cääri atatrongära. Teeme äyeblingta lui epu pana niyyarage gyene tabe liba Aceji Bägrä ne baarge uli cabu cääri acita liiyepu, piiyepu teebine jäägyuge biname bime opo gaabe.

<sup>7</sup> Yoo, mine biname bime mule opo pa yaawatnipesi ai gawe poto cidi me mene cabu ca. Poto gawe te ngupe niiye ne yaanuge, piba miijirage gije bine uutaname jaawenemuge teeme gije liteta biname tääpume. Siige, Acejiyame peei gawe ne miiji jaawenuge.

<sup>8</sup> Yepä, nuuja gawe lui gaalegale seeasea bine uutaname jaawenemuge, siige gije liteta biname te peei gawe ne yaainuge niyyarage gawe ca, cuta pagege uubudera. Yoo, pepu pana cirege äbita miiji mule biname piiyepu niiya mule biname bime tääpume.

<sup>9</sup> Cime miiji binamewale, cine peei mene jijenin-inago weebibine umle ceerame, yepä cine umle gemi egä Acejiyame weene cama gyene. Cine weeme miijirage mule pagege päpäna, epu pana mule biname te jaawenemuge lui äsecräreji ge niyya mule cabu ca.

<sup>10</sup> Yoo, Acejiyame lui cängenarage gyene. Tabelica pagege ngene ätrimela weeme kaakesea piiyepu weeme singi poto cidi me teeme tääpume, weene liba teeme binamewale bine ituge ätityera cuta piiyepu page itityeräjenemiye.

<sup>11</sup> Peei ätityera mule miiji gyene, piiyepu cine babo singi weene yepäyepä pepu cängenarage lena-

jame ngälu pui miji gwidape weene lui tääpume jewagrijeniye liba weeme tääpume cirege äbita.

<sup>12</sup> Weene durau gone, yepä niinäce ätrunga biname bime mule jitutemeye. Teeme ätrunga baborage birige piiyepu teepi cängena umle cama jaawagrijenusi Acejiyame lui tääpume ituge jaji teebibine cerame, siige teepi peei name pi Acejiyame me Mene teeme tääpume toraca jäapänsi.

*Acejiyame me Toraca Mene name pi Mine Gone  
Umle cäco Lenaja*

<sup>13</sup> Niinäce gaabe ätrunga biname Abrahamo lui teeme yepä ge. Acejiyame liba umle mene Abrahamo ne jejuji, tabe teemerage ngii cama jejuji peei mene ne kokre me wawename. Ai ingle naace popi nuuja te lica birige caburage Acejiyame cabu ca, tabe peei name pi teemerage ngii cama peei mene jejuji.

<sup>14</sup> Tabé Abrahamo ne jejuji egä, “Cane meebine umle mene nääcärenine. Cane meebine baborage miji cire naawenepene, cuta piiyepu määme kaakesaare bucurage cirege äbita.”

<sup>15</sup> Yoo, Abrahamo ngenecu kokre cama tewagrijäjumi, siige Acejiyame me mene teeme bau me ibibi äbituji.

<sup>16</sup> Yoo, biname te liba singi teeme mene kokre wawename, tabe babo biname me ngii cabu jaajuge, piba äcela mene ingwe ca äblicäco.

<sup>17</sup> Acejiyame teeme caburage ngii cama pui mene jejuji, peei name pi tabe lui biname bine pui miji mene jejemuji, teepi toraca umle ge egä tabe licarage teeme mene mara me wawena.

**18** Peete negi neeneni baborage gwidape: Acejiyame me jajeji mene piiyepu teeme caburage ngii, cuta peei neeneni tabe äblicäco mara me wawena piiyepu peei poto cidi me tabe äblicäco walya mene iicana. Peei gwidape cabu ca mine umle gemi egä cuta mime tääpume Acejiyame me Mene toraca gyene iyeteta. Mine lui teeme bau otni äsecrera tääpume, mine umle egä tabe mibibine lica abmala ätityera cäco, yepä ciige cire nisecräripi. Peei name pi mime ätrunga teeme bau lui kokre gyene.

**19-20** Peei umle lui epu pana cangka ne liiyepu yaajarusi mime ngene atwanena cabu. Mine äblicäco apu iicana egä, "Teeme mene pama toraca gyene mime tääpume," yepä mine umle gemi egä peei mene lui toraca gyene. Mine umle egä Yeesu pisi nyene cabucewe je Babe ne awejename mime miji tääpume. Yeesu me Aceji Babe bau me otni lui epu gyene iiwäreja mope biname te iiwäreja mete lui cabucewe je pui me cuderage puupu cabu me lipu abacita Acejiyame ne awejename biname bime miji tääpume. Yoo, Yeesu mime niinäce gaabe me Babe bau äduji, pui cabucewe iiwäreja mete cabu peei babo cäbletääpe ne cuderage puupu gome tabe itu iyebingtuji, peei name pi mine ibibi gemi teeme ingwe ca Babe bau otnime. Yoo, Yeesu iiwäreja mope biname me ituge äbita mime tääpume piiyepu teeme kaakesea iyeteta gyene, Melkisideke me liiyepu.

<sup>1</sup> Melkisideke lui Mopeyame ge babo cewe Salema tääpume. Tabé cuta iiwäreja biname ge mime Caburage Acejiyame tääpume. Ujarage, Abrahamo cubu cabu ca liba tacnenutuji, lui cubu cabu je tabe fooa gawe maramara mopeyame cabu ca yuutruiji, Melkisideke teebine gaabe cabu piba opopa jewenuji, jejuji egä, “Acejiyame te meebine baborage miiji pa naawenepi.”

<sup>2</sup> Abrahamo piba cubu cabu ca gwidape bine setomlecmuji ten kupae jwenemuji, siige yepä kupae Melkisideke ne ecäruji. Yoo, Melkisideke me ngii poto cidi me, aboclomta lui “Conocäco Mopeyame” ge. Biname cina teebine nuuja taje yaainusi “Poode me Mopeyame” ca, ingle tabe Mopeyame ge Salema cewe tääpume, piiyepu Salema me aboclomta lui “poode”.

<sup>3</sup> Mime nuuja mene lica teeme mage babe poto cidi me, cuta mene lica ge teeme niinäce kaakesaare poto cidi me. Peei name pi mine umle lica gemi teeme aplimla, teeme budre. Epu pana Aceji Bägrä liiyepu, tabe Acejiyame me iiwäreja biname gyene iyeteta.

<sup>4</sup> Mine ngene jwaatwananinago Melkisideke lipu baborage ge. Tabé baborage ge Abrahamo cabu ca, lui Israela biname bime ingle kaakesaare ge, peei name pi Abrahamo te yepä kupae teebine ecäruji, lui gwidape bine sewademuji cubu cabu ca.

<sup>5</sup> Yoo, Abrahamo me kaakesaare bägrä Leebi me kaakesaare bägrä lui cina iiwäreja biname ge Acejiyame tääpume, sasa cotre mene te jiicenige egä teepi owecu gwidape bine miiji waadena teeme Israela binamewale cabu ca. Mule apu ge: iyeta

Israela biname lui cina gwidape piiyepu deedei jäätämäni teeme kaakesea cabu ca, teepi miji iyeta ten gwidape cabu ca yepä ceera. Iiwäreja biname cina miji pui gwidape waadena, ngänuge teepi piiyepu teeme binamewale iyeta lui Abrahamo me kaakesaare gemi.

**6** Yoo, Melkisideke lica Leebi me ingle cabu ca, yepä Abrahamo teebine yepä kupae ecäruji. Melkisideke piba Abrahamo ne mene jejuji teeme miji tääpume, Acejiyame lui ne temiji jajeji mene ituge ceera.

**7** Yoo, Melkisideke lui baborage ge Abrahamo cabu ca, ingle mine umle gemi egä lui te ibibi birige Acejiyame me miji ne ceera, tabe baborage gyene teeme cabu ca lui te peei miji ne yaacatuge.

**8** Age nuuja mene Melkisideke poto cidi me. Israela biname bime iiwäreja biname lui cina kupae yaawadanemusi teeme binamewale cabu ca, teepi binamerage gemi; teeme lenaja lica iyeteta. Yepä, Melkisideke poto cidi me, Abrahamo lui ne teeme kupae ecäruji, Oogäräneji Mene te jiicenige egä teeme cuta pisi nyene ireclota.

**9** Yoo, apu pana gyene: Leebi, lui me kaakesaare bägrä cina kupae yaawadanemusi Acejiyame tääpume, tabe te kupae ecäruji Melkisideke ne pui yepä padare Abrahamo liba kupae teebine ecäruji,

**10** ingle ngänu ge puu pui padare Leebi lui camuge aplimla, yepä tabe puga ge teeme kaakesaare Abrahamo me tääpe cabu. Yepä, Melkisideke taatu tabe lica nuuja biname ne kupae yääcäruge. Yoo, peei name pi Melkisideke cuta baborage gyene iyeta nuuja iiwäreja biname cabu

ca.

**11** Acejiyame teeme cotre mene Israela biname bine ecäremuji, peeи cabu biname cina iiwäreja biname bime ätityera cabu ca conocäco me äbitame, yepä Israela iiwäreja biname cina äblicäco biname bine toraca conocäco me wawena. Peeи name pi Acejiyame Keriso ne tityepuji biname bine toraca ätityerame, ingle mime iiwäreja mope biname Keriso lica peeи nuuja iiwäreja biname pana gyene, lui cina Leebi piiyepu teeme kaakesaare bägrä Aarona me ingle cabu ca ge. Keriso bab-orage gyene iyeta teeme cabu ca Melkisideke liiyepu.

**12** Yoo, Keriso lui mara iiwäreja biname gyene, peeи name pi Acejiyame cuta cotre mene mara me jewenuji iiwäreja poto cidi me.

**13-14** Yoo, pajecu gyene egä mime Yageyame Keriso tabe lica Leebi me ingle cabu ca ge. Mine iyeta umle gemi egä tabe Yuuda me ingle cabu ca ge, piiyepu Yuuda me inglewale cina iiwäreja kaakesea lica ituge wawena, ingle nuuja menelica ge Acejiyame bau ca Moose bau me peeи kaakesea teebibine ceerame.

### *Yeesu me Kaakesea Lui Melkisideke pana Gyene*

**15** Yoo, pajecurage gyene egä Acejiyame te kirece mara iiwäreja biname ne ituge acata. Page Yeesu pisi nyene mime iiwärejayame. Tabе lui Melkisideke pana gyene,

**16** lica Leebi me inglewale cabu ca sasa mule liiyepu. Tabе teeme iiwäreja biname me ngii piiyepu teeme kokre lica yaacatuge pui sasa cotre mule cabu ca, lui gyene biname bime ingle poto

cidi me, yepä teeme kokre pisi nyene teeme ngälu  
cäco ireclota cabu ca.

<sup>17</sup> Oogäräneji Mene te teeme poto cidi me ji-  
icenige egä,

“Maane iiwäreja biname gäte epu pana Melk-  
isideke liiyepu,  
piiyepu määme kaakesea lui ngälu käco  
gyene.”

<sup>18</sup> Yoo, siige gyene pui sasa cotre mene iiwäreja  
poto cidi me, ingle kokre käco

<sup>19</sup> piiyepu ibibi lica gyene biname bine toraca  
conocäco wawename Acejiyame me opo gaabe je.  
Page mime ätrunga pisi nyene Yeesu me kaakesea  
cabu, lui te ibibi gyene mibibine cängena waadena  
Acejiyame bau me.

<sup>20</sup> Yoo, Acejiyame teeme iiwäreja kaakesea lica  
papa ecäruji Yeesu ne, yepä pui padare tabe cuta  
teeme caburage ngii jiicuji teeme mene kokre me  
wawename. Pui nuuja iiwäreja biname cina lica  
pepu kokre mene cabu ca yaawadanemusi teeme  
kaakesea bine.

<sup>21</sup> Yeesu taatu iiwäreja biname me äbituji pepu  
ngii cama mene cabu ca, Acejiyame liba teebine  
jejuji egä,

“Cane lui Yageyame gäne, cane käme ngii cama ai  
mene pa nääcärene,

piba ai mene licarage mara me wawena.

‘Maane iiwäreja biname gäte iyeteta ngälu käco.’ ”

<sup>22</sup> Siige, ai Acejiyame me ngii cama mene name pi,  
Yeesu ibibi gyene iiwäreja kaakesea wawename,  
pee name pi tabe cuta ibibi gyene kirece jajeji  
mene toraca me wawename niiya mule cabu ca  
äsecrera poto cidi me.

**23** Yoo, nuuja iiwäreja biname teepi bucourage ge pui sasa mule cabu, ingle teeme ireclota ngälu cama ge. Nuuja cina teeme niinäce me puupu ne jaacatanusi.

**24** Yepä, Yeesu me ireclota lui ngälu käco gyene, piiyepu teeme iiwäreja kaakesea nuuja te lica cire juutecrepi.

**25** Yeesu peei name pi ibibi gyene biname bine iyeta cängena äsecrerame teeme niiya mule daremu cabu ca, lui cina Yeesu me kaakesea miji pi Acejiyame bau me otni, ingle tabe puma enajenige iyeteta Acejiyame ne awejename teeme miji tääpume.

**26** Yeesu peese nyene mjjirage iiwäreja babo biname lui mime singi ibibi nitityärinuge. Tabe conocäco gyene, epucäco, piiyepu mara gyene iyeta biname cabu ca, lui cina niiya mule jaawenemusi. Page tabe pisi nyene cabucewe je, cuta teeme ngii cabu me awepäntjeji gyene.

**27** Tabe lica gyene nuuja iiwäreja biname liiyepu lui cina miji iyeta bimu gaabegabe cibu gwidape ca yiiwäräjemu si niinäce teeme niiya mule tääpume, piba cuta iyeta biname bime niiya mule tääpume. Tabe yepä gääbu taatu yiiwäräjuji, tabe liba teeme tääpe ecäruji budre tääpume. Siige, peei lui ibibi gyene biname bine kälyä wawename iyeteta.

**28** Yoo, Acejiyame me cotre mene Moose lui bine sewademuji, peei te iiwäreja kaakesea poto biname bine yääcäremuge, lui cina iyeta binamerage gemi, piiyepu kokrecäco gemi, yepä pui cotre mene ingwe gaabe ca Acejiyame te kirece mene jeejuji, piba teeme ngii cama pui mene ne babo kokre

me jewenuji. Tabé peeí mene cabu teeme Bägrä ne iiwäreja kaakesea ecäruji, tabé lui epucäco piiyepu ibibi gyene ai kaakesea wawename iyeteta.

## 8

### *Yeesu me Iiwäreja Kaakesea Mime tääpume Apu Gyene*

<sup>1</sup> Yoo, iyeta mene cabu ca cine weebibine bii jijinago, ai ngene atwanena baborage gyene egä mime tääpume pisi nyene cabucewe je iiwäreja babo biname lui te adnatäneji enajenige Acejiyame me camu poto teeme miiji puupu cabu.

<sup>2</sup> Tabé iiwäreja biname gyene Acejiyame ne awejename mime tääpume pui cabucewe puupu cabu. Peeí lui Acejiyame me toraca iiwäreja puupu, ingle peema pisi nyene Acejiyame me toraca mete, lica biname bime ime ca wawenäneji, yepä Acejiyame miiji wawenäneji gyene peeí mete.

<sup>3</sup> Yoo, iyeta iiwäreja babo biname teeme kaakesea lui cibu mäju ca Acejiyame ne yiwiräjusi piiyepu nuuja owecu gwidape teebine yääcärusi. Pui name pi cuta Yeesu mime Iiwäreja Babo Biname te miiji Acejiyame tääpume owecu gwidape ceera, siige tabe teeme tääpe ne ecäruji.

<sup>4</sup> Yoo, Yeesu liba ai gawecewe cabu enajuji, tabé iiwäreja biname lica ge, ingle ama ibibi iiwäreja biname pití nemí, lui cina Israela biname bime cotre mene cabu ca yiwiräjemu.

<sup>5</sup> Pui iiwäreja biname bime kaakesea lui owowä pana gyene Yeesu me toraca iiwäreja kaakesea tääpume lui gyene cabucewe je. Teeme iiwäreja mete cuta piiyepu owowä pana gyene

toracarage mete cabu ca lui cabucewe je. Pui name pi Moose liba gwidape jebasecretnemuji mete wawename Acejiyame tääpume, lui mete cibu tääpe ca wawenäneji ge, Acejiyame piba teebine jejuji egä, "Maane iyeta gwidape pui ootonuta pana cängena jewenemepi, cane lipu meeblee itu naawabepene Sinai Podo cabu." Yoo, peei mene cabu ca mine umle egä pui mete lui owowä pana ge cabucewe mete tääpume.

<sup>6</sup> Yepä, Yeesu me kaakesea lui baborage gyene Israela iiwäreja biname bime kaakesea cabu ca, piiyepu kirece jajeji mene Yeesu lui ne mime tääpume toraca me jaawenuji, baborage gyene sasa mene cabu ca, ingle pui mene toraca ibibi gyene egä Yeesu te mibibine niiya mule cabu ca nisecräinuge ten cama iyeteta lenajame.

<sup>7</sup> Sasa jajeji mene, cotre waweneca piiyepu jäje iiwäreja poto cidi me, ibibi lica ge biname bine kälyä wawenecame. Peei liba ibibi gyene, Acejiyame piba singi lica kirece jajeji mene ceerame.

<sup>8</sup> Yepä, sasa mene ibibi lica ge, ingle biname bime niiya mule cuta piti nemi. Acejiyame peei poto cidi me jiicuji Oogäräneji Mene cabu egä, "Cane lui Yageyame gäne, cane jijenininine egä,

'Padare te pa tädepi,

cane piba kirece jajeji mene cire  
jaawenepene

Israela biname bime kaakesaare tääpume,  
cuta piiyepu Yuuda me ingle biname tääpume.

<sup>9</sup> Ai kirece jajeji mene mara gyene sasa jajeji mene  
cabu ca,  
cane lui ne jewenujine teeme niinäce kaake-  
saare tääpume,

cane liba teebibine ime ca sewecnemujine  
Aikupito gawe cabu ca.

Yepä, teepi käme jajeji mene lica cängena acata  
wawenecame.

Cane peei name pi teebibine kaake me jewen-  
emujine.’”

**10** Mime Yageyame cuta jiicenige egä,

“Yoo, agesa kirece jajeji mene cane ingwe  
ca cire jaawenepene Israela biname bime  
tääpume.

Cäme cotre bine cane cire yoogäremepene teeme  
ngene bora;

teeme ngene atwanena cabu cire yaacite-  
pene.

Cane teeme tääpume Acejiyame cirege äbita,  
cuta teepi käme biname cirege lenaja.

**11** Pui padare cabu piba nuuja te lica teeme bi-  
namewale bine,

coo teeme naniganewale bine cire  
yaabiberäjempesi egä,

‘Acejiyame tääpume umle äbitepeye,’

ingle matimati cabu ca modamoda biname me  
teepi iyeta käme tääpume umle cama cire  
yaacrajemepi.

**12** Yoo, cane teebibine kälyä cire jaawenemepene;  
cane ingwe ca lica teeme niiya mule bine  
ngene jaapecnemepene.”

**13** Siige, peei mene cabu Acejiyame jiicenige egä  
teeme kirece jajeji mene tuwängle gyene sasa jajeji  
mene tääpume. Page pui sasa mene te mameta ge  
ämlita.

## 9

*Sasa Iiwäreja Mule Mara Gyene Yeesu me  
Iiwäreja Mule cabu ca*

<sup>1</sup> Niinäce jajeji mene cabu puga ge cotre mene irecu ätumuta mule tääpume. Cuta piiyepu puga ge cäbletääpe ca wawenäneji mete teeme maramara irecu ätumuta piiyepu iiwäreja mule tääpume.

<sup>2</sup> Pui iiwäreja mete ngalebora neeneni puupu puga ge. Pui niinäce puupu lui ne yaainusi Cude Puupu ca, peeи ngalebora nesae gwidape puga ge: ngale me atecwamta puupu, piiyepu dade, cuta piiyepu buluduу pui dade papa cabu. Peeи buluduу ceerajäneji ge Acejiyame ne.

<sup>3</sup> Pui mete cole je jeclänutujisi baborage cäbletääpe ca atri tääpume. Pui cäbletääpe nuuja poto ca lui puupu ne yaainusi Cuderage Puupu ca.

<sup>4</sup> Cuderage Puupu ngalebora puga ge dade lui gol ca acwabäneji ge. Pui cabu iiwäreja babo biname te miji lengo gwidape bine juubudäremuge Acejiyame tääpume. Cuta puga ge gwidape niinäce jajeji mene tääpume jamyacurage uli boks ngalebora. Peeи boks lui gol ca acwabäneji ge. Boks ngalebora me laacitusi neeneni kula lui papa cabu Acejiyame me ten cotre mene oogäräneji ge. Jajeji mene tääpume boks ngalebora cuta puga ge gol karpu. Peeи karpu bora je buluduу pana gwidape ge teepi yaainusi “maana” ca, lui deedei ca Acejiyame biname bine engäremuji deedei cäco gawe cabu. Peeи boks ngalebora cuta puga ge Aarona me otnetneja suru lui te laame bine itu sisemuji awabejame egä Aarona lui Acejiyame me singi biname ge iiwäreja babo biname tääpume.

**5** Peei boks papa cabu puga ge neeneni owowä pana gwidape lui mename seemo pana opo cama, cuta taame cama ge. Teepi boks ne cäängena jaawabäsi egä agesa Acejiyame me lenaja puupu. Iiwäreja babo biname te peei puupu ne cibu uudi ca yää-trupicuge Acejiyame ne awejename biname bime niiya mule äcise-jame. Yoo siige, page lui miji padare lica gyene peei gwidape poto cidi me cängena-cängena abocломäjame.

**6** Iyeta gwidape pepu ge pui sasa mete cabu, teepi luma irecu lätu-mutinusi Acejiyame ne awejename. Iiwäreja biname cina peei nii-näce puupu cabu me yääbäcnusi cuta täsuge iyeta bimu gaabegabe teeme kaakesea wawename.

**7** Yepä, iiwäreja babo biname te taatu labacituge pui ngaleborarage puupu me. Tabé yepä taatu padare cabu kämäge gaabegabe labacitanuge. Tabé miji cibu uudi acana ten cama, pui ca niinäce teeme niiya mule äcisejame, piba cuta iyeta biname bime niiya äcisejame.

**8** Yoo, pajecu gyene Aceji Seemo me abiberäja cabu ca egä gaabe camuge iitnana toraca mete me toraca Cuderage Puupu cabu me abacitame teeme tääpume lui cina pui sasa gawecewe iiwäreja mete cabu cuta yiwiäräjusi.

**9** Mine piba peei cabu ca umle läbitinago egä owecu gwidape piiyepu cibu mäju Acejiyame tääpume acrejetame, peei cina äblicäco biname bime ngenecu conocäco piiyepu plowa me wawename.

**10** Peei iiwäreja mule lui deedei äbita piiyepu niiye nänäja poto cidi me taatu, cuta piiyepu mara-mara äciseja mule tääpume. Iyeta peei mule lui

tääpe poto cidi me, cuta lica ngenecu poto cidi me. Mime saarewale cina miiji pee i mule bine waweneca kälyä me äbitame Acejiyame me opo gaabe je. Teeme ngälu lui Acejiyame liba kirece ireclota pa yääcäremepi.

<sup>11</sup> Siige, Yeesu itu täduji, iiwäreja babo biname me itu äbituji miijirage kirece mule ne aboclomtame. Yepä, page tabe kaakesea lica jewenenige ai gawecewe mete cabu, lui ne biname cina erangujisi, piiyepu lui ge gawecewe gwidape ca wawenäneji. Page tabe kaakesea jewenenige toraca miijirage puupu cabu, lui gyene cabucewe je.

<sup>12</sup> Yeesu Acejiyame me Cuderage Puupu cabu me yepä gääbu abacituji, lica gouti piiyepu kau plongo bime uudi cama, yepä teemerage uudi ca Acejiyame ne yiwäräjuji mibibine kälyä me wawename niiya mule daremu cabu ca iyeteta ireclota cabu äbäcname.

<sup>13</sup> Sasa mule cabu biname liba traci lica ge, piba iiwäreja biname te teebine yäätrupicuge gouti piiyepu rooriye kau bime uudi ca, cuta piiyepu tabe kau plongo ne juubudäruge. Cuta pui me tuuwe mriibe ca piba jäasicmaluge. Peei ca biname te miiji me läbituge Acejiyame me binamewale cama abasutame piiyepu Acejiyame bau me irecu ätumutame.

<sup>14</sup> Peei mule te biname me tääpe ne taatu jugi cäco me jaawenuge, yepä Keriso me uudi ibibi gyene mime trupa ngalebora ne äcisejame. Piba mime ngene atwanena lica mime niiya mule daremu cabu, yepä mime ngene atwanena iyeta lui Acejiyame cabu gyene teeme singi wawename.

Yoo, Aceji Seemo lui iyeteta gyene, teeme ätityera ca Keriso teemämu owecu gwidape pana ituge ceera Acejiyame ne. Tabé budre me äbituji mime niiya mule bine äyeblengäjame, tabé lui epucäco gyene piiyepu teeme nuuja niiya mule lica ge.

<sup>15</sup> Yoo, Keriso gaabe jiitnuji kirece jajeji mene tääpume, ai ingle naace popi lui biname cina ala asogläcneji gemi, teepi piba ibibi gemi miijirage iyeteta ireclota cabu lenajame, Acejiyame te lipu itu jiicuji, ingle Keriso me budre pisi nyene teeme niiya mule bime daremu äyeblengame, lui wawenäneji gemi sasa jajeji mene padare cabu.

<sup>16-17</sup> Yoo, iyeta modamoda biname cina teeme budre niinäce gaabe, teepi mene jaajemusi teeme gwidape poto cidi me egä lui te pagege waadena. Peei budracame me mene ibibi läbituge teeme budre ingwe gaabe ca taatu.

<sup>18</sup> Peei name pi cuta Acejiyame me niinäce jajeji mene poto cidi me teepi miiji cibu eglujisi, piba cibu uudi ca peei mene ne ibibi me wawename.

<sup>19</sup> Cuta peei name pi Moose liba iyeta Acejiyame me cotre mene biname bine jejananemuji, peei ingwe gaabe ca tabe kau plongo me uudi piiyepu gouti me uudi niiye cama elenglecäjemuji, piba maamoi ngäli bine uli ciipe cabu jesoplecäjemuji. Pui ududi ngäli ca Oogäräneji Cotre Mene bine uudi ca itrupecmuji, piba iyeta biname bine cuta itrupecmuji.

<sup>20</sup> Tabé jejemuji egä, “Ai uudi te Acejiyame me jajeji mene toraca kokre me jewenenige, peei name pi weene miiji ai mene ne wawename.”

<sup>21</sup> Yepä pana mule ca Moose te iiwäreja mete ne, iyeta iiwäreja kwäye piiyepu nuuja gwidape cama,

uudi ca cuta itrupecmuji.

<sup>22</sup> Yoo, sasa cotre mene cabu, pama iyeta gwidape uudi ca äcisäjeji ge kälyä me wawename. Niiya mule cuta pepu gyene, miiji uudi asata pee cabu ca kälyä päpäname.

*Yeesu Keriso me Budre Ibibi Gyene Mime Niiya  
Mule Äyebenglame*

<sup>23</sup> Lui gwidape owowä gemi toraca cabucewe gwidape täüpume, miiji pee bine kälyä me wawena sasa iiwäreja mule ca, yepä pepu gawecewe iiwäreja mule ibibi lica gemi cabucowerage gwidape täüpume. Mara jamyacu iiwäreja mule taatu ibibi gyene cabucewe gwidape täüpume.

<sup>24</sup> Peei name pi Keriso lica gawecewe Cuderage Puupu cabu abacitiji, ingle pee biname biji rarangäneji mete lui owowä taatu ge Acejiyame me toraca puupu täüpume. Yepä, Keriso cabucewe puupu me abacitiji. Tabé puma enajenige Acejiyame me opo gaabe teebine awejename mime täüpume.

<sup>25</sup> Tabé cabucewe puupu me licarage jäje abacitanuge teeme tääpe bucourage gääbu ceerame, epu pana Israela iiwäreja babo biname te gawecewe mete Cuderage Puupu cabu me lipu kämäge gaabegabe labacitanuge uudi cama, lui teeme uudi lica ge.

<sup>26</sup> Eewe, ingle pepu liga cirege äbita, Keriso pita piiyepu budre cire läbitaneji bucourage gääbu ai gawecewe me agedna cabu ca, yepä pepu lica gyene. Ai gawecewe liba mameta ge apira, piba

tabe yepä gääbu taatu äduji iyeta niiya mule bine äyeblengame, teeme tääpe liba budre me äbituji.

<sup>27</sup> Yoo, biname cina lipu yepä gääbu taatu budre äbita, siige Acejiyame peei ingwe gaabe ca teebibe  
ine cirege atrana,

<sup>28</sup> Keriso cuta piiyepu yepä gääbu taatu budre äbituji daremu ceerame iyeta biname bime niiya mule tääpume, siige tabe cire tacnenutepi, yepä tabe lica cääri biname bime niiya mule bine äyeblengame. Tabe cire tacnenutepi biname bine waadename iyeteta ten cama lenajame, lui cina teebine jewagrijenisi teeme äsecrera tääpume.

## 10

<sup>1</sup> Yoo, Israela biname bime cotre mene lui cuta owowä pana ge. Peei te läbitanuge abocloamtame Keriso te lui miiji mibibine cire nicäripi. Sasa mule cabu iiwäreja bucurage ge iyeta kämäge gaabegabe, yepä peei iyeta ibibi lica ge biname bine kälyä wawename lui cina singi Acejiyame bau otnime.

<sup>2</sup> Teeme iiwäreja liga ibibi cirege teeme niiya mule poto cidi me kälyä ceerame, biname cina piba lica ingwe ca asicnenta teeme niiya ne; cuta siige piba iyeta iiwäreja.

<sup>3</sup> Yepä, teeme ngenecu bora asicnenta lui miiji lica ge, peei name pi teeme iiwäreja iyeta kämäge gaabegabe lui teeme tääpume ngene apecna pana ge teeme niiya mule poto cidi me,

<sup>4</sup> ingle naace gyene uudi rooriye kau piiyepu gouti cabu ca äblicäco niiya mule toraca äyeblenga.

<sup>5</sup> Peei name pi Keriso me gawecewe cabu me otni padare liba mameta ge, tabe Acejiyame ne

mene jejuji egä,

“Maane singi lica gäte cibu mäju, cibu uudi, pi-  
iyepu nuuja iiwäreja gwidape tääpume,  
yepä maane singi gäte cane cäme binamerage  
tääpe ne ceera budre me.

<sup>6</sup> Maane ngenecu miiji lica gäte teepi liba  
camlecamlle cibu bine kula dade cabu  
juubudäremusi teeme niiya mule daremu  
tääpume.

<sup>7</sup> Cane peei name pi meeble naajenine egä,  
‘Cane age sâne otnime määme singi wawename;  
cäme poto cidi me lipu oogäräneji ge.’ ”

<sup>8</sup> Siige, peei mene cabu Keriso niinäce jejuji  
egä, “Maane singi lica gäte maramara iiwäreja  
mule tääpume; maane gege lica gäte iingäja cibu  
tääpume coo piiyepu iyeta nuuja mule niiya mule  
bine äyeblenga tääpume.” Tabe pepu jejuji, ngänu  
gyene puu cotre mene te jiicenige peei bine  
wawenecame.

<sup>9</sup> Keriso piba jejuji egä, “Cane age sâne otnime  
määme singi wawename.” Siige, Acejiyame  
iyeta sasa iiwäreja mule bine iyebenglemuji, piba  
Keriso ne tuwângle ecituji teeme puupu cabu.

<sup>10</sup> Ai ingle naace popi Yeesu Keriso itu jewenuji  
Acejiyame me singi bine, mine iyeta kälyä gemi  
mime niiya mule cabu ca. Tabe liba teemämu  
iiwäreja pana ecäruji budre tääpume pui yepä  
padare, peei lui ibibi gyene iyeteta ngälu cäco.

<sup>11</sup> Israela iiwäreja biname cina yepä pana  
iiwäreja birige waweneca iyeta bimu gaabegabe,  
yepä pui iiwäreja äblicäco niiya mule bine toraca  
äyeblenga.

**12** Keriso yepä taatu padare yepä gwidape, teeme tääpe ne, ecäruji. Siige, peei lui ibibi gyene niiya mule äyeblengame ngälu cäco. Tabé piba adnatuji Acejiyame me camu poto ime cabu.

**13** Page tabe puma jewagrijenige Acejiyame te teeme cubuyame bine teeme ernge gawe me acraname.

**14** Peei yepä wawena ca tabe biname bine epucäco me jewanemuji iyeteta, tabe lui bine mara me jewanenemige teeme pana äbitame.

**15** Mine umle gemi egä peeи mene toraca gyene, ingle Aceji Seemo te Oogäräneji Mene cabu itu jiicuji egä,

**16** “Yageyame te apu jiicenige, ‘Cane ai jajeji mene cäme biname tääpume cire jaawenepene.

Cäme cotre bine cane cire yoogäremepene teeme ngenecu bora,

cuta teeme ngene atwanena cabu cire yaacitanepene.’”

**17** Tabé cuta jiicuji egä, “Cane lica teeme niiya conocono mule bine cire ngene jaapcne-mepene.”

**18** Pui name pi page siige, nuuja ingle lica gyene gwidape cääri cuta iiwärejame niiya mule äyeblengame.

### *Mine Miji Acejiyame bau Otni Peei Kälyä Acatename*

**19** Cäme ätrunga binamewale, mine miji gemi wälu cäco Acejiyame me Cuderage Puupu cabu äbäcname teeme opo gaabe aclajutame, ingle Yeesu teeme uudi ituge apira mine Acejiyame me biname me äbitame.

**20** Teeme tääpe liba budre, peei te Acejiyame me Cuderage Puupu ne jiitnuji mime tääpume. Teeme budre padare cabu pui babo cäbletääpe, lui te iiwäreja mete cabu Cuderage Puupu ne jäällyenguge, peei te cole je äderäruji. Siige, mime kirece Acejiyame bau me otni gaabe peese nyene Yeesu, lui te page ireclota cama enajenige cabucewe je.

**21** Tabé mime tääpume iiwäreja babo biname gyene Acejiyame me mete ne ire atwime.

**22** Peei name pi mine miji wälu cäco otni Acejiyame bau yepä taatu ngene atwanena cama, tee-bine toraca ätrunga cama, plowa ngenecu cama lui niiya mule cabu ca äcisäjeji gemi, piiyepu jugi cäco tääpe cama lui mijirage niiye ca äcisäjeji gemi.

**23** Mine ätrunga cama cängena ninajininuge, ingle mine umle gemi iyeta Acejiyame me mene toraca me läbituge.

**24** Mine mime nuuja bime poto cidi me ngene pa jwaatwananinago lipu teebibine ätityera ceerame teepi owecu cama lenajame piiyepu miji taatu mule wawename.

**25** Mine gonerage yaabmalusi mime abase-cretna mule ne, poto cina liiyepu, yepä mine mimemime cerämu kokre läcäraninago, ingle mine umle gemi egä Acejiyame me ceräcerägääbü bimu cudecewerage lica gyene.

**26** Yoo, biname te liba Acejiyame me Miji Mene äsecrera poto cidi me yäätecijuge, piba ingwe ca teeme niiya singisingi mule cääri jaawenemuge, teeme tääpume nuuja mara ätityera coo piiyepu iiwäreja lica gyene teeme niiya mule daremu äyblengame.

**27** Yepä, pepu biname lui cina Acejiyame ne jäägyusi, teepi miiji wälu cama lenaja, ingle teeme tääpume pisi nyene atrana piba muye puupu cabu otnime puma iyeteta lenajame.

**28** Yoo, sasa mule cabu apu gyene: Cotre bine Moose lui sogäremuji, lui biname te jaatropangtuge, tabe budre jepänuji owecu käco, liba piti negi neeneni coo nesae ire arbi biname teebine aitnejame.

**29** Peei cabu ca baborage gyene mäpu daremu biname tääpume lui te Aceji Seemo me ätityera ne jäägyuge, lui te gawe me yaacituge Aceji Bägrä ne, piiyepu papa me jaawenuge Yeesu me uudi ne, lui uudi te teeme niiya mule bine ituge äyeblenga Acejiyame me jajeji mene name pi. Pepu biname tääpume mäpurage daremu pisi nyene.

**30** Mine umle gemi Acejiyame lui te jiicuji egä, “Niiya mule daremu lui käme ime cabu sine; cane te cirege ceera,” tabe cuta jiicuji egä, “Yageyame te biname bine cirege atrana.”

**31** Yoo, magerage mäpu teeme tääpume lui cina niiya mule daremu cirege pääpäna mime Ireclota Acejiyame bau ca.

**32** Siige, weene ngene jepecneye pui niinäce padare, weene Acejiyame me Miiji Mene liba ngale pana ecatujiye. Weeme ireclota mäpu ge pui padare, yepä weene lica weeme ätrunga ne ebmalujiye.

**33** Nuuja taje biname cina weebibine niiyarage jicnecininusi piiyepu niiya jiwenininusi. Nuuja taje weeme binamewale bine liba jääpänemuye pepu mäpu cabu, weene wälu lica birige ten cama peeи mäpu cabu gigri lenajame.

**34** Weene owecu jaawenemuye lui bine yaacranemusi krokeciyi mete bora. Weeme gwidape liba weeme bau ca yääyeblingusi, weene cuta ngenecu miji birige, ingle weene umle gemi teepi äblicäco weeme bau ca äyeblenga weeme toraca miji cabucewe je puupu ne, peei lui weemi nemi iyeteta.

**35** Yoo, cuta ai padare cabu weene wälu gone! Weene miji cängena kokre cama inajininuge weeme ätrunga cabu, piba weeme babo miji daremu cirege päpäna.

**36** Weene miji ngenecu kokre cama lenajame, naace täüpume Acejiyame me singi ne wawename, piba teeme mene weeme täüpume toraca me cire läbitepi.

**37** Oogäräneji Mene te jiicenige egä,  
“Matikolä taatu padare piiyeme,  
piba lui te otnime äbitenige, tabe pa tädepi,  
lica däägudägu äbita otnime.”

**38** Cäme conocäco biname cina teepi pa jääatrungepesi, piba peei cabu icrajenige iyeteta.

Yepä, liba nuuja te latatrongäruge, cane lica ngenecu miji teeme täüpume.”

**39** Siige, mine lica gemi pui biname lui cina gaabe cabu ca täcnäruge cuta lapesarinusi, yepä mine jäätrungusi, piba miji ireclota ne ten cama cirege päpäna iyeteta.

## 11

*Mime Niinäce Kaakesaare cina Miji Ireclota ne  
Cire Jääpäneperi Teeme Ätrunga cabu ca*

**1** Ngena gyene ätrunga? Yoo, ätrunga lui apu pana gyene: Mine jaawagrijusi toraca umle cama egä mine lui gwidape tääpume singi, peeи te pagege äbita. Mine toraca umle gemi egä mime singi gwidape pisi nyene niinäce gaabe je, mine pagege oomlana, ngänuge puu ai padare cabu mime cud-ceewe name pi mine äblicäco päpäna.

**2** Yoo, Acejiyame te sasa ätrunga biname bine ewepyeräjemuji teeme ätrunga tääpume.

**3** Ätrunga ca mine umle läbitinago egä ai gawecewe piiyepu cabu je wale bine, iyeta Acejiyame te mene ca jwenemuji, yepä lui cabu ca tabe jwenemuji, mine pui bine äblicäco gemi päpäna.

**4** Ujarage Abela me iiwäreja Acejiyame tääpume lui miji ge teeme naane Kaino me iiwäreja cabu ca teeme ätrunga name pi. Acejiyame Abela me iiwäreja gwidape bine ewademuji awabejame egä Abela me ätrunga mule miji ge. Yoo, Abela uja ge budre, yepä mine teeme bau ca pa labiberäjipesi.

**5** Eenoka Acejiyame ne jitrunguji, peeи name pi Acejiyame teebine cabu me ecitiji budre cäco; tabe papa apesaruji. Biname cina ligi teebine jirnganujisi, teipi äblicäco ingwe ca päpäna, ingle Acejiyame itu ecatuji teebine. Acejiyame me Oogäräneji Mene te jiicenige egä, Eenoka me acatäneji niinäce gaabe me tabe Acejiyame ne ngenecu miji me jwenuju.

**6** Yoo, biname te äblicäco Acejiyame ne ngenecu miji me wawena ätrunga cäco. Ingle naace gyene lui cina singi Acejiyame bau otnime, teipi miji jäätprungusi egä pisi nyene Acejiyame piiyepu tabe babo miji daremu teebibine yääcäremuge, lui cina

toraca jäärngusi teebine.

<sup>7</sup> Nooa peese nyene nuuja biname lui te Acejiyame ne jäättru-nguge. Acejiyame teebine umle mene jejuji ingwe gwidape poto cidi me. Nooa teeme mene jecatuji. Ngänuge tabe lica igi niiye ne jepänuji, tabe babo poo ne eranguji, teeme coga bägrä cama peeи ca isecräremuji babo niiye cabu ca. Nooa me ätrunga mule mara ge nuuja teeme binamewale bime ätecija căco mule cabu ca. Acejiyame teebine teeme biname me jewenuji teeme ätrunga name pi.

<sup>8</sup> Abrahamo Acejiyame ne jäätprunguge. Acejiyame teebine jejuji cewe ne abmalame cudecewe gawe cabu otnime, tabe lui gawe teebine cirege ceera. Abrahamo peeи mene jecatuji otnime. Tabе gaabe cabu äduji, yepä umle lica ge liiyeme ädenige.

<sup>9</sup> Tabе lui gawe cabu enajuji catecewe biname pana, Acejiyame me mene peeи poto cidi me jäätprunguge egä tabe pui gawe teebine cirege ceera. Tabе căbletääpe ca wawenäneji mete bine sewademäjemumi, peeи cabu senajenäjumi tabe, piba Isacako, cuta ingwe ca Yakobu. Teepi iyeta yepä mene ne ecatanujisi Acejiyame bau ca.

<sup>10</sup> Abrahamo lica babo cewe cabu yaanajuge, yepä tabe ngene jwaatwananuge iyeteta lenaja cewe poto cidi me, lica ai gawecewe cabu, yepä Acejiyame lui cewe ne yootonutuji piiyepu eranguji cabucewe je.

<sup>11</sup> Abrahamo babe me äbituji tabe liba sasarage ge, cuta piiyepu teeme coga Saara te bägrä ne jepänuji, lui te ngälu pui padare äblicăco ge bägrä päpäna. Abrahamo Acejiyame ne jitrunuji teeme

mene bägrä poto cidi me toraca me äbitame, siige teeme kokre te tacnenutuji, tabe imäbägrä ne jepänuji.

<sup>12</sup> Peei name pi Abrahamo, lui te mameta ge bägrä cäco budre, teeme bau ca secluji bucurage kaakesaare, epu pana bucurage cabu je wale lipu gemi. Secre pana bucurage gemi teepi, biname te äblicäco acnema.

<sup>13</sup> Iyeta peeи biname cina teeme ätrunga cama budre. Acejiyame me mene camuge toraca me äbita teeme tääpume, yepä teepi umle ge egä miji pisi nyene ingwe ca, peeи name pi ngenecu miji cama budre. Teepi jiicujisi egä, “Cime toraca cewe ama lica gyene; cine catecewe biname pana ninajininige ai gawecewe cabu.”

<sup>14</sup> Peeи mene cabu ca mine umle gemi egä teepi singi toraca cewe tääpume lui gyene cabu je.

<sup>15</sup> Teeme ngene atwanena lica teeme sasa cewe cabu je, lui ne ituge abmala. Teepi liba singi cirege peeи tääpume, teeme padare puga ge äcnärame,

<sup>16</sup> yepä teepi singi lica. Iyeta teeme singi lui cabucewe tääpume, lui mijiirage gyene iyeta nuuja cewe cabu ca. Peeи ätrunga name pi Acejiyame ajiri lica gyene teeme tääpume, yepä tabe singi egä ätrunga biname cina teebine yaainusi teeme Acejiyame ca, ingle naace gyene tabe mijiirage cewe ne itu emacetnäjuji teeme tääpume.

<sup>17</sup> Acejiyame liba Abrahamo me ätrunga epicnantuji, Abrahamo teeme mene cuta jitrunguji, teeme yepä taatu bägrä Isacako ne kula dade cabu etecwamtuji Acejiyame ne ceerame.

<sup>18</sup> Tabе ngene jotwananuji Acejiyame me mene poto cidi me egä, “Määme toraca kaakesaare eei

gemi lui määme bägrä Isacako bau ca,”

<sup>19</sup> piba ngene ca egluji egä Acejiyame ibibi ge Isacako ne budre cabu ca awecnistame. Pepu pana äbituji. Acejiyame Isacako ne Abrahamo bau me secwenistuji, Isacako liba mameta ge budre päpäna.

<sup>20</sup> Ingwe ca Isacako ätrunga cama teeme bägrä Yakobu piiyepu Esau naabibine jaajuji teeme miiji poto cidi me ciige padare cabu.

<sup>21</sup> Cuta Yakobu teeme budre mameta, tabe mene jaajuji teeme neenení saare bine, Yoosepa me bägrä. Tabe ätrunga ca jaajuji teeme miiji poto cidi me ciige padare cabu. Tabe suru cama arpinantuji, irecu ätumutuji Acejiyame ne awepyeräjame.

<sup>22</sup> Yoosepa cuta piiyepu teeme budre mameta mene jiicuji egä Acejiyame te Israela biname bine cire yaawademepi Aikupito gawe cabu ca. Teeme ätrunga baborage ge, peei name pi mene jejemuji egä, “Ingwe ca käme kaake bine ama cita ca cire ewecnemepeye piiyeme mime Kanana gawe cabu me.”

<sup>23</sup> Yoo, Moose me mage babe Acejiyame ne cuta jitrungujäsi. Teepi jamyacu opo bägrä ne jepänujäsi, piba ätrunga ecitujäsi Acejiyame bau me teeme bägrä asatame Aikupito gawe Mope Biname me cotre cabu ca, lui cotre imäbägrä agleca tääpume. Teepi wälu lica ge Moose ne ämlitame nesae mabye cama.

<sup>24</sup> Moose liba utige, tabe singi lica ge Aikupito gawe Mope Biname me ingle cabu lenajame,

<sup>25</sup> pätä tabe singi ge Acejiyame me biname cama abasutame teeme mäpu ireclota cabu lenajame,

lica ge pui niiya mule biname cama matikolä padare otinetneja teeme miiji ireclota cabu.

**26** Tabé ngene ca egluji egä miijirage cirege, tabé liba iicetna päpäna teeme äsecrera biname Keriso name pi. Peei name pi tabé Aikupito gawe biname bime miijimiji gwidape iyeta jigyemuji, ätrunga cama jewagrijuji miiji daremu ne päpäname ciige.

**27** Tabé Acejiyame ne jitrunguji ätityerame teebine. Aikupito gawe ne liba sebmaluji, tabé wälu lica Mope Biname me claabe tääpume. Tabé licarage tacnenutuji, yepä Acejiyame cama äduji epu pana tabé teebine opo awatna ten cama lui ne biname cina äblicäco päpäna.

**28** Moose Acejiyame ne jäätprunguge teeme binamewale äsecrerame teeme mäpu ireclota cabu ca Aikupito gawe je. Tabé peeи name pi biname bine jejemuji maamoi plongo ne agli Äsuplengta deedei wawename, piba pui me uudi ca mete grana bine apyacame. Piba Acejiyame me agleca mename seemo te teeme mete bine isuplengemuji, uuge bägrä bine lica eglecimuji peeи mete cabu, yepä Aikupito gawe biname bime mete cabu taatu.

**29** Israela biname cina Acejiyame me ätityera cabu jitrungujisi, teepi conocäco yuurujisi malu lui ne yaainusi Ududi Malu ca. Peeи lui epu pana teepi doro gawe cabu ecluji. Yepä, Aikupito gawe biname cina ligä yuurujisi Israela biname bine äcwetname, teepi iyeta abumitnuji, siige.

**30** Israela biname bime ätrunga name pi babo cewe Yeriko me kula caale te itramuji. Camuge atrama, Israela biname cina peeи caale ne piba

jewaclomäjenujisi iyeta seben bimu cama, Acejiyame lipu teebibine itu jejemugi.

**31** Yepä ero magebi teeme ngii Rahaba, tabe lica budre ne jepänaji nuuja Yeriko cewe biname cama. Teepi te singi lica ge Acejiyame me mene ätecijame, yepä Rahaba jitprunguji Acejiyame ne. Israela biname cabu ca neeneni ire tääpume biname bine tabe te jaawabuji piiyepu äätityärugi.

**32** Yoo siige, cerämu biname piti nemi pepu pana, yepä padare ibibi lica gyene mene jaajaname Gideona, Baraka, Samson, Yepeta, Daawida, Samwela, piiyepu iyeta sasa mename biname poto cidi me.

**33** Peei biname iyeta Acejiyame ne jäätprungusi tabe te teebibine ätityerame. Teepi yuutrutujisi nuuja gawe cubuyame biname cabu ca, teeme biname bine cängena ire jetwemujisi, piiyepu pui miji bine jepänanemujisi, Acejiyame lui poto cidi me ituge jaji. Layani cina äblicäco teebibineagleca,

**34** muye wädräji äblicäco oomlana teebibine, cuta piiyepu teepi cubu turikä budre cabu ca äsecräruji. Poto cina teeme tääpe liba bleela, teepi cuta cääri kokre jääpänusi. Poto cina cubu me kokre cama yaaluge, piba nuuja gawe cabu ca biname cina temiji pi luucratnuge.

**35** Poto magebi ätrunga name pi teeme budre biname ewademujisi ireclota cama.

Nuuja pui biname cina mage pita piiyepu budre jepänujisi, ingle teepi singi lica ge Acejiyame bau ca äyeblengame pee i pita piiyepu budre cabu ca äsecrerame, yepä teepi Acejiyame ne

jäätrungusi tabe te teebibine cirege arpinera miji-rage cabucewe ireclota täüpume.

<sup>36</sup> Teeme poto bine niiyarage bääclena me jaawenemusi, jidnanininusi, nuuja bine jaamlemeläjemu siige krokeciyiye mete bora me yaacranimus.

<sup>37</sup> Poto bine kula ca eglecimujisi, poto bine cole je jeclanimujisi, cubu turikä ca teepi budre jepänujisi. Poto cina cäbletääpe cäco, maamoi piyyepu gouti tääpe bine asigrärinujisi. Teeme deedei piyyepu gwidape lica ge; poto cina pita piyyepu mäpurage ireclota jepänujisi nuuja biname cabu ca.

<sup>38</sup> Teepi uucratnujisi daapo taatu cewe cabu me piyyepu podo cabu me, kula waja piyyepu cupicu bora je ämletnärinujisi. Pui biname iyeta Acejiyame ne jäätrungusi, yepä ai gawecewe me ireclota lui miji lica ge teeme täüpume.

<sup>39</sup> Acejiyame teebibine iyeta ewepyeräjemugi teeme ätrunga täüpume, yepä teepi camuge päpäna iyeta pui miji ne Acejiyame lui ituge jaji teebibine ceerame,

<sup>40</sup> ingle Acejiyame singi gyene teepi mime ireclota padare ne awagrijame, piba teepi mine cama gigri cirege päpäna pui iyeteta epucäco ireclota ne.

## 12

*Acejiyame      Iyeta      Teeme      Bägrä      bine  
Yaablawäjemu*

<sup>1</sup> Yoo siige, bucurage ätrunga biname cina ituge uutruta. Mine epu pana uuwamena biname gemi liiyepu teeme sobe cabu. Miji mine iyeta mime mäpu äyeblenga piyyepu poto niiya mule lui cina

mibibine cuta noomlenininisi. Mine piba gaabe cabu cängena uuwametna.

<sup>2</sup> Mine irecu yaacranemesi Yeesu bau me. Tabe mibibine niwadanenininige mime ätrunga cabu, ngälu peei te epucäco me cire läbitepi cabucewe je. Tabe teeme gaabe ne lica ebmaluji baarge uli cabu budre äbita name pi, yepä tabe baarge uli ne ecatuji, ajiri ngänuge tabe budre äbituji mime täüpume, ingle tabe budre gaabe cabu ngene jottwananuji egä teeme niinäce gaabe me babo gege pisi nyene. Siige, tabe budre cabu ca arpinantuji, page tabe pisi nyene adnatäneji Acejiyame me camu poto ime cabu je.

<sup>3</sup> Mime gaabe liba mäpu, liba worämu me läbitinago, mine piba ngene pa jwaatwananinago Yeesu me mäpurage ireclota poto cidi me. Niiya mule biname liba teebeej jimugentnujisi, tabe cängena enajuji. Mine cuta gone worämu name pi toraca gaabe ne yaabma-lusi.

<sup>4</sup> Toraca, weene niiya mule cama läciseräjininuye, yepä peei cabu ca weene lica budre ne ituge päpäna.

<sup>5</sup> Nää, weene pama ngene jitrimalinininige Acejiyame me miiji mene weeme täüpume egä, “Cäme bägräwale, imyemutinege weeme Yageyame me ablaweja mene ätecijame.

Cane liba weeme niiya mule yaabocломäjimune, gone mäpu ngene atwanena yaacatuaye.

<sup>6</sup> Ingle naace gyene käme singi biname bine cane yaablawäjemune.

Cane käme singi biname bine cane yaablawäjemune, cuta yääsecräremune.”

<sup>7</sup> Weene ablaweja yaacatuye Acejiyame bau ca, ingle tabe epu pana weebibine jiwenininuge bägrä bine liiyepu. Yoo, iyeta bägrä yepäyepä teeme babe te yaablawäjuge.

<sup>8</sup> Acejiyame liba weebibine lica iblawäjininuge, teeme nuuja bägrä bine lipu yaablawäjemuge, piba weene lica gemi teeme toraca ingle biname.

<sup>9</sup> Mime uudi babe cina mibibine niblawäjinusi, piiyepu mine teebibine opo gaabe me yaacranimusi. Piba mine miji cuta mime Aceji Babe me ablaweja ne ngenecu miji cama acata cuta pee cabu ca mjjirage ireclota ne päpäname.

<sup>10</sup> Mine liba bägrä je, mime babe cina piba nibiberäjininujisi teepi lipu ngene jwaatwa-nimus eä miji ge, yepä Acejiyame me ablaweja lui iyeta padare conocäco gyene piiyepu mime miji täüpume. Tabé singi mine teeme pana mara conocäco me äbitame.

<sup>11</sup> Ablaweja padare cabu mine gege lica birige, yepä ngenecu mäpu, yepä ingwe ca mine ngenecu poode birige piiyepu miji mule cabu ninajininuge.

### *Gone Acejiyame me Mene Ägyi*

<sup>12</sup> Yoo, kaakesea biname te liba gloose me läbituge, tabe miji teeme kaakesea gwidape teeme ime ca cängena oomlana, piiyepu teeme ernge liba diibe läbituge, tabe piba miji cängena aclajuta, pepu pana mine miji cängena lenaja gloose cäco.

<sup>13</sup> Weene conocäco gaabe cabu pa naaclepi, piba lui kokre cäco biname cina weeme ingwe ca otni, teepi lica weeme conocono gaabe name pi

atrametna niiya päpäname, yepä conocäco gaabe cabu teepi miji me läbitininusi.

**14** Weene singi läbitininuye iyeta biname cama poode lenajame. Weene conocäco ireclota yaabiberäjimuye, ingle laati te conocäco ireclota ne jäägyuge, tabe lica mime Yageyame ne cirege päpäna.

**15** Weene iyeta weemeweme cängena ire atwip-eye, piba weeme nuuja te lica pagege atatrongära Acejiyame me miji cabu ca. Weene cuta cängena ire egä gonerage ngenecu niiya me äbita. Gonerage weeme yepä te peei mule ne gije jaabacituge, ingle peei mule te wata birige babo äbita. Ngenecu niiya te mime nuuja biname bime ätrunga mule ne sabe jaawenuge.

**16** Cuta cängena ire sargi mule poto cidi me. Gonerage acata peei mule ne. Piiyepu gone Acejiyame ne kaake me wawena, Esau liiyepu. Yoo, teeme yene Acejiyame me babo mijiirage mene uuge bägrä täüpume, yepä tabe liba loolomecewe te joomluji, piba teeme singi deedei täüpume lui baborage ge, yepä teeme singi Acejiyame me miji täüpume matikolä ge. Tabe Acejiyame me babo miji uuge bägrä täüpume igane ne ecäridge yepä deedei päpäname.

**17** Weene umle gemi egä ingwe ca tabe lipu baborage singi äbituji uuge bägrä me babo miji ne päpäname, yepä lica jepänaji, ingle tabe äblicäco teeme niinäce singi cäco mule ne mara me wawena. Tabe däbume ele engenuji.

*Sasa Jajeji Mene Lui Sinai Podo cabu ca piiyepu  
Kirece Jajeji Mene Lui Siyyona Podo cabu ca*

**18** Yoo, sasa Israela biname poto cidi me weene ngene jotwa-nanineye. Teepi liba Sinai podo wajwa jeclajutemuji Acejiyame me cotre mene baborage wälu cama ätecijame, puga muye kloka te wädräji cama tasatuji. Piba krokeciyiye me äbituji; babo buuwe te tipwäjuji.

**19** Baborage ala sengenuji moole pana gwidape cabu ca. Puma cita ca babo tagepogogo tasatuji epu mage mäpu mene cama egä lui cina itecijemuji, teepi jejujisi ätecitame.

**20** Teepi baborage wälu ge Acejiyame me mene tääpume egä, “Laati te podo ne joomluge, ngänu gyene biname coo cibu gwidape, peei ne miiji kula ca budre me agli.”

**21** Peei iyeta epu babo wälu cama ge Moose te jiicuji egä, “Cane naclonecnige piiyepu babo wälu gäne.”

**22** Yoo, weene lica Sinai podo gome wälu cama naaclige, yepä weene wälu cäco ituge otni Acejiyame me puupu mameta me, lui puupu epu pana gyene Siiyona podo liiyepu. Weene naaclige Irecloota Acejiyame me cewe mameta me, lui Cabucewe Yerusalem. Puma teeme toraca bucourage mename seemo babo gege cama abasecretnige.

**23** Weene ituge otni Acejiyame me ätru-nga ingle cabu abasecretname, luma iyeta biname uuge bägrä pana gemi, lui bime ngii oogäräneji gemi cabucewe je. Weene Acejiyame bau ituge otni, lui te jaatranemuge iyeta biname bine. Peema weene abasecretname conocäco biname bime seemo cama, Acejiyame lui bine epucäco me ituge wawena.

**24** Peema Yeesu pisi nyene, lui te gaabe ne jiitnuji kirece jajeji mene tääpume, teeme uudi ne liba yiwiäräjuji weeme niiya mule bine äcisejame. Yoo, Yeesu me uudi lica ge epu pana Abela me uudi liiyepu. Abela me uudi te singi ge budre daremu tääpume, yepä Yeesu me uudi te biname bime budre daremu ne yääyeblingtuge.

**25** Ai ätityera name pi, weene cängena ire ina jipi. Acejiyame me mene tääpume gone ätecija căco läbitininuye. Yoo, pui sasa Israela biname lui cina singi lica ge Acejiyame me cotre mene ätecijame gawecewe podo cabu ca, teeme tääpume äsecrera gaabe lica ge. Mine piiyepu, mime äsecrera gaabe lica gyene, mine liba Acejiyame me mene ne kaake me wawena, lui mene te twaatnuge cabucewe cabu ca.

**26** Yoo, Acejiyame liba mene jejemuji Sinai podo cabu ca, teeme tagepogogo te ai gawe ne jekocnäjuji, yepä page ai ingwe ca padare cabu tabe jiicuji egä, "Cäro, cane nuuja taje ai gawecewe cuta piiyepu cabucewe căäri cire jaakocnäjepene."

**27** Teeme "nuuja taje" mene me aboclomta agesa: Lui gwidape Acejiyame jewenemuji, nuuja taje tabe peei bine cire yääyeblinge-mepi akocneja ca, piba lui gwidape äblicăco akocneja, peei cina cire yaacrajepi.

**28-29** Yoo, mime cabucewe puupu, Acejiyame luma mibibine cirege waadena ten cama lenajame, peei ne äblicăco akocneja coo äyeblingta, peei name pi mine miji Acejiyame ne baborage eso yääcäresi. Yoo, Acejiyame me kokre baborage gyene, epu pana budni me kokre te biname bine lipu yaabemuge. Peei name pi mine miji

teebine wälu piiyepu cängena cama awepyeräja teeme singi mule ca.

## 13

### *Acejiyame te Singi Ai Mule tääpume*

<sup>1</sup> Mimemime singi läbitininago Keriso me toraca nanigane pana.

<sup>2</sup> Mine cuta miji ngene jaapecnimusi catecwe biname bine awablame cuta deedei piyyepu ngene oocana puupu ceerame. Yoo, poto cina pepu ituge wawena Acejiyame me mename seemo tääpume, yepä teepi pui bine cängena opolica awatnujisi.

<sup>3</sup> Krokeciyiye mete biname mine gone ngene nitrimalinuge teebibine ire atwemame. Mime owecu teeme tääpume miji epu baborage äbita mine lui owecu ne singi birige päpäna, mine libaten cama krokeciyiye mete cabu ninajininuge. Nuuja biname lui cina niiya jääpänusi biname bauca, mine miji teebibine owecu jaawenemusi, epu pana mine pui mäpu cabu cewe loocaninusi teepi liiyepu, ingle mine iyeta yepä tääpe gemi.

<sup>4</sup> Magebi rooriye me gigri ireclota mijirage gyene Acejiyame me opo gaabe je. Peei gigri lenaja ne gone sabe wawena. Acejiyame te mäpu daremu cirege ceera biname lui te ero jaawenuge nuuja magebi coo rooriye cama, coo lui cina nuuja sargi mule bine jaawenemusi.

<sup>5</sup> Mime ireclota cabu gone singi äbita baborage rarekaake tääpume, yepä mime ibibi gwidape cama ngenecu gege cama ninajininige, ingle Acejiyame mibibine itu nijinuji egä, “Cane licarage

weebibine abmala; cane age säne weebibine ätityerame.”

**6** Peei name pi mine wälu cäco jiicemusi,  
“Yageyame lui cäme ätityerayame gyene.

Cane lica wälu pa läbitepene biname bime täüpume.”

**7** Mine niinäce gaabe mope biname bime täüpume ngene jaape-cnemusi, lui cina Acejiyame me mene mime täüpume seboclomtujsi. Teepi ätrunga cama icrajemuji piiyepu ätrunga cama budre. Mine miiji teeme pana ätrunga ne yaacatesi.

**8** Yoo, Yeesu Keriso lica mara me läbituge; teeme mule yepä pana cema, page, piiyepu iyeteta.

**9** Gone maramara kirece abiberäja cina padare ceera weebibine mara gaabe cabu waadename. Mine miiji mime ngenecu kokre päpäna Acejiyame me miiji cabu ca, piiyepu miiji lica gyene apicetnera mime ngenecu kokre päpäname mara-mara deedei mule cabu ca. Lui cina peei mule bine jaawenemusi, teepi lica miiji päpäna peei cabu ca.

**10** Yeesu me baarge uli lui mime täüpume epu pana iiwäreja dade liiyepu, yepä lui cina Israela biname bime cäbletääpe mete cabu yiiwäräjusi, teeme conocäco lica gyene mime dade cabu ca teeme kälyä päpäname.

**11** Pui Israela biname bime mule ca, iiwäreja babo biname te cibu uudi yaacanuge iiwäreja mete Cuderage Puupu ngalebora me iiwärejame niiya mule bine äyeblengame, yepä peei cibu kaake bine juubudäremusi cewe cidecärä je.

**12** Peei name pi Yeesu budre äbituji cewe kaake poto ca biname bime niiya mule teeme uudi ca puma äcisejame.

**13** Yoo, mine miiji mime sasa iiwäreja mule abmala teeme bau otnime, ingle tabe lui Israela biname bime iiwäreja mule kaake poto ca gyene. Tabe mage äcneca mene ituge ätecija teeme mara mule name pi. Mine cuta piiyepu teeme pana äcneca mene nitecijinuge.

**14** Peei ngänu gyene, ingle mime iyeteta lenaja cewe lica gyene ai gawecewe cabu je, yepä mine ama jewagrijenisi lui cewe ne mine cabu je cirege päpäna.

**15** Peei name pi mine miiji iyeta padare cabu Acejiyame ne awepyeräjame Yeesu me ätityera cabu ca. Pepu pana awepyeräja mime tagepogogo cina liba Yeesu me ngii jajanena, peeи lui Acejiyame me singirage iiwäreja mule gyene.

**16** Mine gone yaabmalusi miiji mule wawenecame piiyepu ätityera ceerame mime yepäyepä, ingle naace popi cuta peeи mule lui Acejiyame me singi iiwäreja gemi.

**17** Weeme ätrunga mope biname bime mene itecijipi teeme singi wawename, ingle weeme seemo ireclota lui teeme ire atwi cabu gemi. Teepi miiji Acejiyame bau me teeme kaakesea poto cidi me aboclomtame. Teeme mene weene liba yaacatuye, teepi piba ngenecu gege cama teeme kaakesea jaawenemusi, yepä weene liba ätecija cäco läbitininuye, teepi piba ngenecu mäpu cama teeme kaakesea jaawenemusi. Pepu cabu ca weene lica ätityera ne jääpänyye.

**18** Cuta weene irecu lätumutinuye cime tääpume.

Cine ngene ca eglenisi egä cime ngenecu pajecu gemi, ingle cine toraca singi gemi miji mule taatu wawenecame.

**19** Cane baborage singi gäne weene apu irecu ätumutame egä cane wata acnenutame weeme bau me.

**20** Acejiyame mime Yageyame Yeesu ne budre cabu ca serpinan-tuji. Teeme budre cabu ca tabe itu asatuji mime mijirage Ire Atwi Biname tääpume, mine lui epu pana teeme maamoi gemi. Teeme uudi liba tapiruji pee te jajeji mene ne ngälu cäco ibibi me jewenuji.

**21** Mime Poode cama Acejiyame cane teebine ewejanenine iyeta weeme singi gwidape ceerame teeme singi cängena wawename. Cane teebine cuta ewejanenine tabe teeme singi ne acitename weeme yepäyepä trupa cabu. Tabé Yeesu Keriso me kaakesea ca pee ne jaawenuge. Yoo, jamyacu apacyera lui teeme yene iyeteta ngälu cäco. Eso!

### *Ceräcerägääbu Mene*

**22** Cäme binamewale, weene iyeta käme umle mene cängena itecijipi weeme ngenecu kokre wawename, ingle käme bucourage mene lica gemi.

**23** Cane weebibine umle jiwenininine egä mime biname Timoti basatige krokeciye mete cabu ca. Tabé liba wata atyaramta aimä, piba yepä pa niclege weeme bau me.

**24** Cane sebore jiwenininine iyeta weeme mope biname cuta piiyepu iyeta Acejiyame me binamewale. Italiya gawe cabu ca ätrunga binamewale cina weebibine cuta sebore jiwenininisi.

**25** Yoo, Acejiyame me miji te weeme iyeta bime cabu lenajame. Siige käme mene.

**Ireclota Mene  
The New Testament in the Bine Language of Papua  
New Guinea  
Nupela Testamen long tokples Bine long Niugini**

Copyright © 1993 Bible Society of Papua New Guinea

Language: Bine

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

---

PDF generated using Haiola and XeLaTeX on 18 Mar 2025 from source files  
dated 31 Aug 2023

0b7e6c06-9d83-54ea-bc99-bd2fbdf2dfe4